

Logronan di Beijing?

Promé i durante e di kuater Konferensia di Nashonnan Uni riba Hende Muhé na Beijing, China (30 ougùstùs te 15 sèptèmber) tabatin deskushonnan kayente. En kontraste, ora e 4969 delegado representando 189 pais, e 4020 persona na e Foro di Organisashonnan No Gubernamental i e 3235 miembro di prensa a bai kas, despues ku 4,5 mion florin a ser gastá, un silencio a reina. Te awe--dos i mei luna despues--nos no a tende un relato ofisial sitando e logronan di e konferensia. (Of nos ta skucha i lesa e emisoranan, korantnan i revistanan robes?)

E sitio mes a lamta preguntanan. Aktualmente ningun pais ta oprimí mas hende muhé ku China ku su lei di "un yu pa famia." Hopi pareha deseando ku nan úniko yu por ta un hònber ta abortá e beibi si e ta di sekso femenino. Komo resultado na algun parti di China, 64 porshento di e poblashon ta maskulino. Ademas, e pais aki ta monitor e siklo di menstruashon di damanan pa nan por identifká esnan ku embaraso no-aprobá pa lastra nan bai un klinika i mata e yu...ABORTO OBLIGA! Pues, nèt e pais ku kruelemente ta likidá miones di beibi muhé tabata e sitio pa un konferensia pa bienestar di hende muhé. Ki trasteria!

Kiko a ser lográ? E dokumento final ta kontené vários aspekto positivo. E ta kondená violensia doméstiko, prostitushon obligatorio, pornografia, mutilashon di e órgano genital femenino, suttee (kimamentu di esposa bibu huntu ku esposo morto), sterilisashon obligá, i violashon. Ma kiko di otro logro?

E konferensia na Beijing di bèrdat tabata un guera di ideologia. E dokumento ku a sirbi komo base di diskushon a ser skirbí dor di femenistanan radikal promoviendo nan agenda trosí. Nan tin un rabia riba e famia manera nos konosé i ta konsiderá matrimonio rais di tur maldat ku hende muhé ta eksperenshá. Aborto ta un forma aseptabel pa plania famia i mester ta sin restriksion. Na lugá di dos sekso, nan ta boga pa hende selektá for di sinku sekso: hònber, muhé, homoseksual, lèsbian, i bi-seksual. Segun nan, pa hende muhé e relashon lèsbian ta esun preferí!

E femenistanan radikal no a logra nan meta, ma tòg e dokumento final ta kontené kompromisonan preokupante.

Maske 70 porshento di hende muhé na mundu ta esposa i/òf mama, di baina e dokumento di Beijing ta menshoná e famia i e ròlnan aki di hende muhé. I ora matrimonio òf e famia ta menshoná, ku frekuensia e ta tresé dilanti den un lus negativo. Femenistanan radikal a bringa pa inkluí e frase "e famia den tur su forman" pa pèrmití unionnan di e mésun sekso. Tabatin diskushon fuerte riba punto aki i porfin a yega na un frase di kompromiso: "Den diferente sistemanan kultural, politiko i sosial, vários forma di famia ta eksistí..." E frase aki tòg por ser usá fásilmente pa hustifiká unionnan homoseksual.

Kontrario di pasado, e dokumento di Beijing ta hasi kontrol di e dama su propio seksualidat i reproduksion un "derechu humano." Fuera di e konsepto kuestionabel aki, tin un pregunta mas básiko. Esaki ta nifiká ku un bida parotin, homoseksualidat, i aborto awor por bira un "derechu humano?"

Siguiendo e patronchi establese pa e konferensia na Cairo, Egipto sèptèmber, 1994, no tabatin kambio relashoná ku aborto. Aborto no a ser deklará un derecho universal òf aseptá komo un método di plania famia manera algun a deseá. Ma tòg e dokumento ta enfatisá ku aborto mester ta seif, ignorando e echu ku NUNKA aborto ta seif pa e beibi konserní.

Derechunan di mayornan a ser ataká. Maske "responsabilidatnan, derechunan i debènan di mayornan" ta menshoná, e úniko responsabilidadat ku e dokumento ta afirmá ta pa dirigí i guia e yu. E linguahe aki ta duna e mucha e responsabilidadat pa hasi su mes desishonnan irespekto di su mayornan.

Hende kier sa ku nan por reinventá mihó loke Dios prefekto a krea. Ma ningun konferensia, foro, òf kumbre por logra. Dios ta bisa, "Laga e malbado bandoná su kamina, i e hende inhustu su pensamentunan...Pasobra méskos ku e shelunan ta mas haltu ku tera, asina...Mi pensamentunan mas haltu ku boso pensamentunan" (Isaias 55:7-9). Dios Su plan pa hende muhé (i hònber i yunan) ta keda e mihó plan apesar di e "logronan" kuestionabel na Beijing!